


SAMARALI MULOQOTLARDA IQTISODIY-INVESTITSIYAVIY HAMKORLIK ISTIQBOLLARI MUHOKAMA QILINDI

O‘zbekiston Respublikasi Prezidenti Shavkat Mirziyoyev Osiyo taraqqiyot banki Boshqaruvchilar kengashining 59-yillik yig‘ilishi doirasida 3-may kuni Samarqandda Osiyo taraqqiyot banki prezidenti Masato Kanda va bir qator nufuzli delegatsiyalar rahbarlarini qabul qildi.



Osiyo taraqqiyot banki prezidenti Masato Kanda uchrashuv avvalida mamlakatimiz yetakchisiga bank Boshqaruvchilar kengashining 59-yillik yig‘ilishi O‘zbekistonda o‘tkazilishini qo‘llab-quvvatlagani va ko‘rsatgan ko‘magi uchun samimiy minnatdorlik bildirdi.

O‘zbekiston va Osiyo taraqqiyot banki o‘rtasidagi keng ko‘lamli o‘zaro manfaatli hamkorlikni kengaytirishning amaliy jihatlari muhokama qilindi.

Hamkorlikni yuksak darajaga ko‘tarishga erishilgan chuqur mamnuniyat bilan qayd etildi. O‘tgan 30 yilda OTB O‘zbekistonning haqiqiy strategik sherigiga aylandi.

Loyihalar portfeli qariyb 16 milliard dollari tashkil etmoqda, amaliyotlar hajmi bo‘yicha O‘zbekiston bankning mintaqadagi eng yirik hamkorlaridan biriga aylandi.

Temir va avtomobil yo‘llari, energetika va ijtimoiy infratuzilmalarni modernizatsiya qilish, suv ta‘minoti hamda kanalizatsiya tarmoqlarini yangilash, qishloq xo‘jaligi va xususiy sektorni rivojlantirish hamda boshqa yo‘nalishlar bo‘yicha muhim loyihalar amalga oshirildi va davom etmoqda.

O‘zbekiston Prezidenti va bank rahbari sammit doirasida imzolangan OTB bilan sheriklik bo‘yicha 2030-yilga qadar bo‘lgan davrga mo‘ljallangan yangi dasturga kiritilgan umumiy qiymati 12,5 milliard dollarlik loyihalarni o‘z vaqtida va samarali amalga oshirish muhimligini ta‘kidladi.

Ipoteka bozori, xususiy sektor, yoshlar va ayollar tadbirkorligini qo‘llab-quvvatlash, kambag‘allikni qisqartirish, inklyuziv ta‘lim va inson kapitalini rivojlantirish borasidagi islohotlarni ilgari surish, raqamli innovatsiyalarni joriy etish va maxsus iqtisodiy zonalarda infratuzilmalarni modernizatsiya qilish kabi sohalarida hamkorlikda ishlashga kelishib olindi.

Markaziy Osiyo mintaqasida yirik infratuzilmaviy loyihalarni, shu jumladan, bankning mablag‘larni safarbar etishdagi yetakchiligini kuchaytirish orqali ilgari surishga alohida e‘tibor qaratildi.

O‘zbekiston Prezidenti OTB rahbariyati va jamoasiga Boshqaruvchilar kengashi yig‘ilishi muvaffaqiyatli va samarali o‘tishini tiladi.

Uchrashuv yakunida O‘zbekiston va Osiyo taraqqiyot banki o‘rtasida 2030-yilgacha mo‘ljallangan sheriklik dasturini almashish marosimi bo‘lib o‘tdi.

Koreya Respublikasi Bosh vazirining o‘rinbosari, iqtisodiyot va moliya vaziri Ku Yun Chxol boshchiligidagi delegatsiya bilan uchrashuvda O‘zbekiston — Janubiy Koreya alohida strategik sheriklik munosabatlarini yanada mustahkamlash va ko‘p qirrali hamkorlikni kengaytirish masalalari ko‘rib chiqildi.

Yuqori martabali mehmon O‘zbekiston Prezidentiga Koreya Respublikasi Prezidenti Li Chje Myonning samimiy salomi va eng ezgu tilaklarini yetkazdi. Yetakchilarning Nyu-York shahrida bo‘lib o‘tgan uchrashuvi natijalari mamnuniyat bilan qayd etildi.

Chuqur tarixiy do‘stlik rishtalari, o‘xshash mentalitet, an‘analar va qadriyatlariga asoslangan ikki tomonlama aloqalar izchil rivojlanmoqda.

O‘zbekiston Prezidenti Janubiy Koreya bilan savdo-iqtisodiy va investitsiyaviy hamkorlikni kengaytirish masalalariga alohida e‘tibor qaratdi.

O‘zaro savdo va investitsiyalar ko‘rsatkichlari barqaror o‘sib bormoqda. Joriy yil boshidan tovar ayirboshlash hajmi 12 foizga oshdi. Mamlakatimizda qariyb 1 mingta qo‘shma korxonada faoliyat yuritmoqda, Koreya investitsiyalarining umumiy hajmi 8 milliard dollardan oshdi.

Ushbu mamlakat kompaniyalari uchun maxsus sanoat zonasini tashkil etish masalalari ishlab chiqilmoqda.

Koreya Eksimbanki va uning jamg‘armalari bilan ko‘p yillik samarali hamkorlik yuqori baholandi. Ular ishtirokidagi loyihalarning umumiy portfeli 2 milliard dollardan oshdi.

Ko‘p tarmoqli klinika, kimyo markazi va farmatsevtika parki qurilishi davom etmoqda. Bugun Toshkent — Xiva yo‘nalishida birinchi “Hyundai Rotem” poyezdi qatnay boshladi.

O‘zbekiston Prezidenti ustuvor yo‘nalishlarda yangi investitsiya loyihalari portfelini shakllantirish va hududlararo almashinuvlarni jadallashtirish muhimligini qayd etdi. Davlat moliyasini boshqarish tizimini raqamlashtirishda Koreya tomoni ko‘maklashishiga umid bildirildi.

Joriy yil kuz oyida Seul shahrida o‘tkazilishi rejalashtirilgan “Markaziy Osiyo — Koreya” sammiti va boshqa oliy darajadagi tadbirlarga tayyorgarlik ko‘rish muhimligi ta‘kidlandi.

Yaponiya moliya vaziri Satsuki Katayama boshchiligidagi delegatsiya bilan muloqotda Yaponiya xalqaro hamkorlik banki (JBIC) boshqaruvchisi Nobumitsu Xayasi va Yaponiya

xalqaro hamkorlik agentligi (JICA) katta vitse-prezidenti Masao Yahara ham ishtirok etdi.

Subhat avvalida Satsuki Katayama mamlakatimiz yetakchisiga Yaponiya Bosh vaziri Sanae Takaichining salomi va samimiy tilaklarini yetkazdi.

Davlatimiz rahbarining 2025-yil dekabr oyida Yaponiyaga amalga oshirgan tashrif ikki tomonlama munosabatlarda yangi davrni boshlab bergani ta‘kidlandi.

Muloqot chog‘ida iqtisodiy hamkorlikning ijobiy sur‘atlari alohida qayd etildi. Tovar ayirboshlash hajmi ortmoqda, Yaponiyaning yetakchi kompaniyalari ishtirokida yirik investitsiya loyihalari amalga oshirilmoqda.

O‘zbekiston Prezidenti mamlakatimiz moliya tizimini modernizatsiya qilish, xususan, g‘aznachilik sohasiga sun‘iy intellektni joriy etish, raqamli moliya transformatsiyasi va ushbu yo‘nalishda yuqori malakali mutaxassislarni tayyorlash bo‘yicha bir qator istiqbolli tashabbuslarni ilgari surdi.

Qayta tiklanuvchi energiya, tibbiyot, axborot texnologiyalari, transport va qishloq xo‘jaligi sohalaridagi ijtimoiy ahamiyatga ega loyihalarni jadallashtirishga kelishib olindi.

“ACWA Power” kompaniyasi rahbari Muhammad Abunayyan boshchiligidagi delegatsiya bilan uchrashuvda sheriklik aloqalarini kengaytirish va qo‘shma loyihalarni jadallashtirish masalalari ko‘rib chiqildi.

Davlatimiz rahbari O‘zbekiston “yashil” energetika sohasining asosiy hamkori bo‘lgan “ACWA Power” faoliyatini yuqori baholadi. Qayd etilganidek, o‘tgan yil dekabr oyida boshlangan yangi investitsiya tashabbuslari, jumladan, quyosh va shamol elektr stansiyalarini barpo etish loyihalari belgilangan rejalar asosida izchil amalga oshirilmoqda.

Muloqot davomida hamkorlikning istiqbolli yo‘nalishlariga ham alohida e‘tibor qaratildi. Xususan, “Yangi Toshkent” xalqaro aeroporti qurilishini boshlash, Farg‘ona shahrida ko‘p tarmoqli tibbiyot muassasasini barpo etish, IT-parkda zamonaviy ma‘lumotlar markazini ishga tushirish kabi masalalar muhokama qilindi.

Uchrashuv yakunida saudiyalik investorlar O‘zbekistondagi islohotlar va yaratilgan qulay investitsiya muhiti uchun minnatdorlik bildirib, loyihalarni sifatli va o‘z vaqtida amalga oshirishga tayyor ekanliklarini ta‘kidladilar.

O‘ZA

MUQADDAS QADAMJOLARNI OBOD QILISH — AJDODLARIMIZ XOTIRASIGA HURMAT, YOSH AVLOD MA’NAVYI TARBIYASIDA MUHIM OMIL

O‘zbekiston Respublikasi Prezidenti Shavkat Mirziyoyev Osiyo taraqqiyot banki Boshqaruvchilar kengashining 59-yillik yig‘ilishi tadbirlarida ishtirok etish uchun 3-may kuni Samarqand shahriga tashrif buyurdi.

Ezgu qadriyatlarimizga muvofiq, avvalo, Imom Buxoriy majmuasi ilgar bir kunda 12 ming ziyoratchiga xizmat ko‘rsatgan bo‘lsa, bugungi kunda 65 ming nafar ziyoratchini qabul qilish qavatiga ega.

Ma‘lumotlarga ko‘ra, qutlug‘ qadamjo o‘chilganidan so‘ng bir oy ichida buyuk muhaddis bobomiz maqbarasini 1 milliarddan ortiq yurtodoshimiz va xorijiy fuqaro ziyorat qildi.

Prezidentimiz majmuaga tashrif buyuruvchilarga yanada qulay sharoitlar yaratish, ibodatlarini ado etishlari, buyuk muhaddis bobomiz merosi bilan yaqindan tanishishlari uchun barcha imkoniyatlarni kengaytirish bo‘yicha ko‘rsatmalar berdi.

Shuningdek, majmuaga avtotransportda keluvchilar uchun to‘xtash joylarini kengaytirish, ziyoratchilar sayr qiladigan hududlarni yanada obod qilish, ularning dam olishi uchun tabiiy va qulay muhit yaratish, bu boradagi ishlarni doimiy tahlil qilib borish, har olti oyda majmuada ziyoratchilar uchun yaratilgan sharoitlarni o‘rganib, qo‘shimcha choralarini belgilab borish muhimligi ta‘kidlandi. Butun yurtimizdan imom-xatibalarni majmuaga taklif qilib, malakasini oshirish zarurligi qayd etildi.

Davlatimiz rahbari ziyorat madaniyatini yuksaltirish, muqaddas qadamjolar va mozorlarni obod saqlash bo‘yicha tizimli ishlarni yo‘lga qo‘yish, bunday maskanlarda kelib-ketuvchilar uchun munosib sharoit yaratish muhim ekanini, o‘tganlar xotirasiga hurmat ruhini kuchaytirish yosh avlodning o‘zligini anglashi va ma‘naviy tarbiyasida muhim omil bo‘lishini ta‘kidladi.

Prezident Shavkat Mirziyoyev 4-may kuni Samarqandda Osiyo taraqqiyot banki Boshqaruvchilar kengashining 59-yillik yig‘ilishi ochilish marosimida nutq so‘zlaydi.

Yig‘ilishning bosh mavzusi — “Taraqqiyot chorrahalari: mintaqaning o‘zaro bog‘liq kelajagini ilgari surish”. Forum global va mintaqaviy iqtisodiyotni

rivojlantirishning ustuvor yo‘nalishlarini muhokama qilish uchun muhim xalqaro platforma bo‘ladi.

Ishtirokchilar asosiy e‘tiborini “yashil” transformatsiya, energetika o‘tish, raqamlashtirish, investitsiyalarni jalb qilish, oziq-ovqat xavfsizligi, sanoatda yetkazib berish zanjirlarining barqarorligi va boshqa masalalarga qaratadilar.

Sammitda bank bilan hamkor mamlakatlar delegatsiyalari, Osiyo taraqqiyot banki, Jahon banki, Xalqaro valyuta jamg‘armasi, Osiyo infratuzilmaviy investitsiyalar banki va boshqa institutlar rahbarlari va xodimlari hamda xorijiy hukumatlarning 2 ming nafariga yaqin vakillari, yetakchi kompaniyalar va banklar, transmilliy korporatsiyalar top-menajerlari hamda nufuzli ekspertlar ishtirok etadi.

O‘zbekiston 1995-yildan buyon Osiyo taraqqiyot bankining a‘zosi bo‘lib, uning eng yirik hamkorlaridan biri hisoblanadi: loyihalar portfelining umumiy hajmi qariyb 16 milliard dollarni tashkil etmoqda. Mamlakatimiz bankning yillik yig‘ilishiga ikkinchi bor mezbonlik qilmoqda.

Ziyodulla JONIBEKOV,
G‘olib HASANOV,
O‘ZA muxbirlari



Prezident qarorlari — hayotda va nazoratda

TADBIRKORLIKNI QO‘LLAB-QUVVATLASH VA SOHADAGI ISLOHOTLARNI IZCHIL AMALGA OSHIRISHDA IJRO INTIZOMI HAL QILUVCHI AHAMIYATGA EGA

Mamlakatimizda tadbirkorlikni qo‘llab-quvvatlash, biznes muhitini yanada yaxshilash hamda xususiy sektorni iqtisodiyotning asosiy harakatlantiruvchi kuchiga aylantirishga qaratilgan izchil islohotlar amalga oshirilmoqda. Bu jarayonda Prezidentimizning tadbirkorlar bilan har yili o‘tkaziladigan ochiq muloqot shaklidagi uchrashuvlari nafaqat muammolarni aniqlash, balki ularni amaliy hal etish mexanizmlarini belgilab berishda muhim ahamiyat kasb etmoqda.

Mazkur muloqotlar yakuni bo‘yicha qabul qilinadigan farmon va qarorlarda belgilangan vazifalar ijrosini o‘z vaqtida va to‘liq ta‘minlash esa kutilgan natijalarga erishishning asosiy omilidir.

Xususan, tadbirkorlar ko‘rgan muammolar asosida ishlab chiqilgan chora-tadbirlar “yo‘l xaritalari” orqali aniq vazifalar, muddatlar va mas‘ul ijrochilar kesimida belgilab berilayotgani ijro intizomini kuchaytirishga xizmat qilmoqda.

Ijroni ta‘minlash jarayonida mutasaddi vazirlik va idoralar tomonidan tizimli nazorat o‘rnatilishi, topshiriqlarning bosqichma-bosqich bajarilishi hamda qilingan ishlar yuzasidan doimiy monitoring yuritilishi natijadorlikni oshirishda muhim ahamiyatga ega. Shu orqali qabul qilingan qarorlarning qog‘ozda qolib ketmay, amalda tadbirkorlik subyektlari faoliyatida ifodasini topishi ta‘minlanmoqda.

Ayniqsa, ma‘muriy to‘siqlarni bartaraf etish, moliyaviy qo‘llab-quvvatlash mexanizmlarini kengaytirish, soliq va bojxona tartib-taomillarini soddalashtirish kabi yo‘nalishlarda belgilangan vazifalar ijrosi tadbirkorlik muhitida sezilarli ijobiy o‘zgarishlarga olib kelmoqda. Bu esa, o‘z navbatida, biznes subyektlarining faolligini oshirish, yangi ish o‘rinlari ochish va investitsiyalarni jalb etish katta ahamiyatga ega.

Shu bilan birga, ijro intizomini mustahkamlash, mas‘ul tashkilotlar faoliyatini muvofiqlashtirish hamda natijadorlikka erishishda jamoatchilik nazorati va tadbirkorlar fikr-mulohazalarini inobatga olish muhim o‘rin tutadi. Bu esa davlat organlari hamda biznes o‘rtasida ochiqlik va o‘zaro ishonch muhitini yanada mustahkamlaydi.

Davomi 3-beta

